

De Lòòdrache

Frienòr hein d'litté vòn Greschòney meischtens véh ghät.

En tag hein es paar schéfra entschlosset, nué weide z'sieche, òn sinn éns grösse Lòòtal ganget.

Ém grösse Lòòtal éscht de wòald sotte décke gsid, dass désché noasiechra sinn schier nid vorwärtskéemet.

Dschi hein angfanget, d'bouma z'felle, well dschi hein welle platz fer nué weide machò.

D'manna hein mét ériò bielene òn soage wie bsässné gwéerchòt. Pletzléché heindsch en schreckléché brélletò khért.

Désché òmentschléché gschreie hein de mandiené z'bluet en den oordre loa gschtòrne.
- Äs éscht grusam ! hein gwéssé gschruet.
- Gamber z'ròck éns dòrf, hein anderé stémme gseit.

D'muetégschtò manna hein entschlosset, uszfénne vòn woa chéémé dée lärm. Dschi sinn langsam òn vorséchtég én de woald kanget òn òf eim moal heindsch de drache gsét. Es riségs griens mòschter, wo hät flònge gspouèt.

D'Greschòneyer schéfra sinn erschtròckté fòrtgloffet
òn, wenn dschi sinn ém dòrf ankéemet, heindsch den
andre bouera abgroatet, doa embruf z'goa. Fer es zittié
éscht keis mé en z'gröss Lòòtal kanget.

Aber d'véhtroppna hein nué weide brucht.
- Wier schengen de bode vòn Lòò dem ma, woa tét
de drache, hein d'énwòhnera vòn Greschòney gseit.

De vorschlag éscht sotte éntéressante gsid, dass, trotz
der gfoar, méhréré muetégé manna hein désché
schwérò ufgab anghét.
Aber leider heindsch keis gléck ghät.

Sébe mandiené vòn Tschòssil òn Lòòmattò heindsch entschlosset, eppes gäge de drache z' erfénne.

- Wier chennen wier de drache tête? hät e jònge ma òs Lòòmattò gfregt?

- Wier messen dschin usnahm grösse hònger usnétze, hät en andre entchädet.

- Wier messen éndsché chräft zéemelecke! hein d'énwòhnera vòn Tschòssil gschrüet.

- Wier mäschten e stier es joar vòneim, hät der ältchte von éne gseit.

Noa sébe joar éscht de stier riség gsid. D'sébe Geschòneyera hein d'hòrné vòm stier mét ise bteckt, fer sché spétzé z' machò, òn hein z'tier éns grösse Lòòtal trébet, well dschi heins dem drache welle opfrò. De drache hät de stier férsché ufkäset..

Wegs de schreckléche gschreie òs dem Lòòwoald éscht di nacht én de dòrfé doa derbi keis erlanget z' schloafe.

Das sinn d'gschreie vòm drache gsid. D'spétzò hòrné vòm stier heinmò de mage zerschrésset, wie d'sébe mandiene hein ghät vorusgsét.

Chòmm äs éscht groabet, sinn litté embruf of Lòò kanget, fer z'gsé, was éscht gschiet. Dschi hein de drache tòte émmene bluetsee gfònnet. Sètter due hät keis mé angscht ghät, embruf òf d'schénò Lòòweide z'goa. Di matte sinn jetza vòn de sébe schloue manna gsid, déene mò de tod vòm drache verdangt.